

**Keputusan Tsu Koon tidak jejaskan parti  
Utusan Online  
November 18, 2011**

KUALA LUMPUR 17 Nov. Keputusan Presiden Gerakan Tan Sri Dr. Koh Tsu Koon untuk tidak bertanding pada pilihan raya umum akan datang tidak akan menjejaskan peluang Barisan Nasional (BN) untuk mencapai kemenangan di Pulau Pinang.

Sebaliknya, Timbalan Perdana Menteri, Tan Sri Muhyiddin Yassin berkata, tindakan itu memberi peluang kepada Tsu Koon untuk menumpukan usaha yang akan memberi kemenangan bagi kerusi-kerusi ditandingi calon parti tersebut.

Beliau berkata, keputusan pemimpin parti komponen terpenting BN itu dibuat selepas mengambil kira saranan ahli-ahli parti yang mahukan Tsu Koon mengukuhkan persediaan parti dalam menghadapi pilihan raya.

"Mungkin beliau telah mengambil kira pandangan ahli-ahli parti yang pernah menyuarakan perkara itu pada Perhimpunan Agung (Gerakan) baru-baru ini.

"Pastinya ada pemimpin-pemimpin pelapis yang saya percaya mampu memikul tanggungjawab dan melaksanakan agenda untuk pastikan Gerakan mendapat sokongan dari rakyat," katanya.

Timbalan Perdana Menteri itu berkata demikian selepas meraikan kegembiraan murid yang menerima keputusan Ujian Penilaian Sekolah Rendah (UPSR) di Sekolah Kebangsaan Sentul (I), Kuala Lumpur, di sini, hari ini.

Katanya, di peringkat pucuk pimpinan BN, keputusan Tsu Koon itu dilihat sebagai tindakan yang mengambil kira pandangan ahli parti selepas meneliti kehendak pengundi selepas pilihan raya yang lalu.

"Kita harap Gerakan sebagai parti komponen penting dalam BN akan menumpukan soal-soal bagaimana kerusi yang diletakkan calon mereka boleh mencapai kemenangan," katanya.

Sementara itu, beliau turut menyampaikan penghargaan kepada Tsu Koon di atas jasa yang dicurahkan sepanjang perkhidmatannya kepada kerajaan dan parti.

Hakcipta Terpelihara © UTUSAN MELAYU (M) BERHAD

Source:

[http://www.utusan.com.my/utusan/info.asp?y=2011&dt=1118&pub=Utusan\\_Malaysia&sec=Politik&pg=po\\_01.htm](http://www.utusan.com.my/utusan/info.asp?y=2011&dt=1118&pub=Utusan_Malaysia&sec=Politik&pg=po_01.htm)